

Aen Mbanj Neix Vihmaz Heuhguh Angqbing

这个屯为什么叫央兵

□ Vangz Gozgvanh / 黄国观

Youq Bingzgoj Si Maxdaez Cin Daemzrenh Cunh miz aen mbanj ndeu heuhguh Angqbing. Vihmaz heuhguh aen coh neix ne?

Dingq bouxgeq Mbanjangqbingz naeuz, doenghbaez gizneix mbouj miz mbanj hix mbouj miz ranz. Miz ngoenz ndeu, miz daegcoz he daengz neix daeuj ciengx vaiz. Miz duz ma' ndangq ndeu riengz de daeuj. Sawqmwh, duz ma' ndangq neix youq henz gaiq rinbanj ndeu "vaep vaep" raeuq mbouj dingz. Daegcoz neix roxnyinh geizheih couh byaij gvaqbae yawj, cij raen miz boux vnz ndeu boemz youq gwnzrin, caih duzma baenzlawz raeuq, de ning hix mbouj ning. Daegcoz neix byaij gyawj baez yawj, doeksaet yat, boux vnz neix gaenz dai gyangj lo. De doq buet dauq ndawmbanj naeuz hawj gyoengq vunzmbanj.

Daegcoz daiq gyoengq vunzmbanj daeuj daengz neix, gyoengq vunzmbanj saeqsim cimyawj boux dai neix, cij raen laeng hwet de raek miz fagmid iq ndeu; aen mauh de miz aen haj gak sing saekhoengz ndeu.

Gyoengq vunzmbanj naemj: Boux dai neix aiq dwg bouxbing ndeu, aiq dwg youq gizlawz caeuq vunzdig doxhoenx caeuq budui saetsanq lo, youq gwnz roen ra budui cingqngamj

gvaq gizneix. Lauheiq de dungx iek youh hozhawq, raen aen angqrin miz raemx, couh aeu fwngz gop gwn raemx. Hoeng, doeklaeng couh dai bae lo.

Bouxcuengh mbanjrungh soqlaiz simsoh lauxsaed. Daihgya doengh fwngz, hawj boux dai neix roengz namh lo.

Gvaqlaeng, boux vnz mbanjrungh ndeu dingqnyi gyoengqvunz baihrog gangj, aen mauh miz haj gak sing saekhoengz couhdwg bing hungzginh, caemhcai ndaej rox bing hungzginh dwg vih bouxgunz guh gwzming.

Boux vnz mbanjrungh neix roxnyinh caezgya guh gienh saehndei ndeu. Dauqranz le couh ciu vunzlai doxyaeng, youq henz moh bouxbing hungzginh neix hwnj aen ranzmiuh ndeu. Caemhcai hawj doiq lwggyax beixnuengx singq Maj ndeu daeuj guenj aen miuh neix.

Doiq lwggyax beixnuengx neix baenzngoenz youq ndaw miuh hwnjieng, baet sauq, gvej gij rum haz seiqhenz ranzmiuh bae.

Aenvih ranz gyoengqde liz ranzmiuh gyae, moix ngoenz song beixnuengx neix sai haujlai seizgan youq gwnz roen baedauq.

Gvaqlaeng, beixnuengx neix hixnaengz daengz aen dieg liz ranzmiuh mbouj gyae he dap aen bungz ndeu, moix ngoenz guh gij hong ndawmiuh sat lo, couh youq diegfwz seiqhenz hai reih ndaem doenghgo.

Beixnuengx neix baet aen ranzmiuh seuqfitfit, daengz cai daengz ciet vunzmbanj seiqhenz daeuj hwnjieng cungj rimhoz raixcaix. Ngamq bi ndeu, aen dieg neix couh gve mak rang mbin, bit gaeq baenz bang lo. Beixnuengx neix gaenz guhhong youq seiqhenz cungj cienz doh lo, haujlai dahsau cungj naemj haq hawj songde guh yah.

Beixnuengx neix fatcaiz lo, couh youq henz bungz hwnj aen ranz hung ndeu. Guh ranz caenh de, vunzmbanj seiqhenz cungj gag daeuj bang hong, ndawde miz haujlai dahsau, gyoengqde bang hong caemhcai daeuj yawjyawj beixnuengx neix baenzlawz yiengh. Songde hix dajsuenq ranz hwnj baenz le couh aeuyah.

Mbouj geijlai nanz, ranz moq hwnj baenz lo. Haeuj ranz moq ngoenzde, hix dwg ngoenz beixnuengx neix caeuq song dahsau doxaeu. Vunzmbanj seiqhenz cungj daeuj goenghoh, nauhyied dangqmaz, boux-

boux naj maez riu angq, vah ndei mbouj daengx.

Bouxgeq naeuz "cijaeu bouxvunz gaenz, gag youq gag miz nyeq(noh), gag geq gag miz yah", gij vah neix caen mbouj dwg gyaj, songde couhdwg yienghneix.

Gyoengq vunzmbanj nyinhnaeuz, beixnuengx neix daj gungzhoj bienq miz, gizneix daj diegfwz bienq nauhyied, hawj gyoengqvunz sim'angq, cungj dwg bouxbing neix baujyouh, ndigah, gyoengq vunzmbanj couh heuh aen dieg neix guh dieg "Angqbing" lo.

"Angq", youq Vahcuengh bonjdieg neix miz song aen eiqsei, aen ndeu couhdwg aen gumz rin miz raemx neix; lingh aen ndeu couhdwg simangq.

Gyoengqvunz rox aen dieg neix ndei, boux dem boux ranz doek ranz senj daengz gizneix daeuj youq, vunzlai couh bienq baenz mbanj, aen coh mbanj couh heuhguh Angqbing.

Seizneix byaij haeuj seizdaih moq lo, Mbanjangqbing ranzranz hwnj ranzlaeuz, gij luengq cungj dwg roensuijiz, gizgiz seuqcingh. Vih geiqniemh bouxbing hungzginh neix, Daengz cai daengz ciet ranzranz cungj bae miuh baiq de dem.

25. Bit meh biz,
Roengz raemx mbouj raen riz.
(Dumq faengx)

26. Mbaek naz hausak,
Boux raen boux gvak.
(Moj ngaiz)

27. Goeng laux hwet enj,
Gwnz ndang seiq gaiq benj.
(Biengzbeih)

28. Gvan boemzhoemj,
Yah dingjai,
Doek fwn ok ndit mbouj lau dai.
(Vax)

29. Cam:
Gijmaz youq gungxdah,
Fwnraq rwed mbouj dumz?
Duzmaz youq ndawdaemz,
Dajcaemx ndang mbouj mbaeq?

Hoiz:
Gomungz youq gungxdah,
Fwnraq rwed mbouj dumz.
Duzbit youq ndawdaemz,
Dajcaemx ndang mbouj mbaeq.

Vah Duenz

谜语

□ Soucomz Cingjleix Veiz Daz

30. Lauxbaeuq daenj buh hau,
Ngutngeuj sang youh sang.
(Hoenz)

31. Diuzmieng iet bae gyae,
Diuzdah lae bae biengz.
(Loh)

32. Gwnz hix dat,
Laj hix dat,
Cunggyang miz duz byalat.
(Bak)

33. Bak lumj bak roegga,

Ga lumj ga duzgoep.
(Geuz)

34. Goek goz byai soh,
Miz hoh mbouj miz mbaw.
(Cungq)

35. Duzvaiz dai henzdaemz,
Boux daengz boux bae heh.
(Rinbaenz)

36. Yaetyaet gvaq henzreih,
Yeixyeix gvaq henznaz,
Gut gumq youh gut ga,
Lwgda youq gyanghwet.
(Faggeuz)

37. Beixnuengx caet bet boux,
Humx diuzsaeu caez naengh,
Buhvaq caez caemh daenj,
Sik le caenh faengya.
(Gyaeujsuenq)

(3)

